

PREDGOVOR DRUGOM IZDANJU

Ovo je drugo izdanje udžbenika Viktimologije, izmijenjeno i dopunjeno, sa naglaskom na aktuelna zbivanja u savremenom društvu. Ona se posebno odnose na životnu sredinu i održivi razvoj i njihovu destrukciju. Naročita pažnja je posvećena žrtvama organizovanog kriminaliteta u čijem se gro planu nalazi prostitucija i trgovina bijelim robljem, te narko-kriminal. Oni su uzeli velikog maha u Bosni i Hercegovini i nalaze se u samom vrhu nacionalne patologije. Danas je životna sredina (biosfera) toliko ugrožena da prijeti katastrofom tolikih razmjera da je u pitanju sam opstanak čovječanstva. Naučnici koji se bave problemom ekologije označili su kritičnu granicu 2020. godine.

Da se osvijetle žrtve multidimenzionalno, u uzročno-posljedičnoj vezi, pristupilo se interdisciplinarnoj obradi pojedinih poglavljia. Posebno je obradena *in extenso* materija iz Međunarodnog humanitarnog prava (MHP), kao fundamentalna kategorija u kriminološko-victimološkoj naučnoj oblasti.

Koristeći se desetogodišnjim iskustvom u egzistiranju Viktimologije na Fakultetu kriminalističkih nauka u Sarajevu, izloženu materiju u ovom udžbeniku prilagodili smo sa onim temama koje najviše istražuju uzajamnu vezu kriminalizacije sa viktimalizacijom. Na taj način će se istražiti fenomen žrtve kao takve u cijelosti.

Viktimalizacija kao mlada grana nauke sve više čini prodor da zaživi na fakultetima društvenih nauka, pravnim fakultetima prevashodno. Ovi izazovi vremena su nas dodatno motivisali da uradimo solidan udžbenik, a sve u cilju što potpunije edukacije modernog pravnika. Posebno treba istaknuti da je izložena teoretska materija bogato ilustrirana sa primjerima iz životne prakse autora. Kazuistika je odabrana iz domena kriminalističke prakse, a na ravni kriminološko-victimoloških prelamanja.